



Cun superbia chanta il chor en tut ils idioms rumantschs. Manuela Bühler (emprima retscha 5avla da dretg.) maina quel dapi 21 onns.

FOTO AUGUSTIN BEELI

## «Mies c(h)or sto oz cantar»

Dapi 131 onns datti a Son Gagl in'uniun che tgira l'amicizia tranter ils Grischuns en la chapitala da la Svizra Orientala e conturn. Il chor maschadà è ina pitga impurtanta da quella. La FMR ha visità in exercizi, in mais avant la festa svizra da chors.

AUGUSTIN BEELI/FMR

Cun la dirigenta *Manuela Bühler* ha il Chor maschadà grischun da Son Gagl pudì sa profilar en la chapitala da la Svizra Orientala. Quest chor exista dapi 1891. Oz saja el daventà ina vaira pitga per l'Uniun grischuna da Son Gagl, di il president *Gion Pieder Casaulta*. Sco en las autras citads pli grondas da la Bassa constateschan ins actualmain ina tscherta indifferenza envers uniuns, cunzunt uniuns grischunas sentan quest regress d'interess. Pli che 130 onns tgira ins a Son Gagl la cumpagnia tranter ils emigrants. Ins fascheva quai anc avant 20 onns cun il teater obligat, cun il concert dal chor, sairas ilaricas, ina maisa radunda da l'emna e dal mais e schizunt cun la visita da Son Niclà. Ils temps cun tantas activitads èn passads.

### Dirigenta dapi 21 onns

Dapi in decenni marchescha il chor maschadà preschientscha a Son Gagl sco part da l'uniun grischuna a Son Gagl. Il parsura *Gion Pieder Casaulta* è engaschà tant en l'uniun sco en il chor dapi decenni. Ses bab è da Lumbrein, sia mamma da Salouf. 1991 ha el reactivà il chor maschadà che era sa durmentà. Sco bassist è el losch ch'il chor po chantar cun ina dirigenta tant competenta sco amicabile e fidaivla.

Lonn 2000 era *Manuela Bühler*, creschida si a Samedan cun geniturs oriunds da la Val Schons, s'annunziada per il post vacant da dirigenta. Sco giuvna magistra en perfecziuna-

ment professional era ella s'annunziada sin in appel ch'il chor aveva scrit en La Quotidiana. Il schaner 2001 ha ella cumenzà a diriger quel. «Davent da l'entschatta ha ella chapì da trair ed entusiasmar nus», raquinta *Gion Pieder Casaulta*. Cun ella ha il chor fatg in svilup remargabel. Il 2012 è il Chor maschadà grischun da Son Gagl sa participà cun grond success a la festa chantunala da chant a Trun. Sias produzioni da pensum han ils experts taxà cun il predicat «excellent».

### Grond'onur per il chor – envidà a Gossau

Entant abita *Manuela Bühler* cun sia famiglia a Winterthur. Per l'exercizi emnil viaggia ella dapi l'atun passà puspè mintga mesemna saira a Son Gagl. Ils dus onns da la pandemia han influenzà quel. «Avant la pandemia eran nus 52 chantaduras e chantadurs, oz anc 32», declera *Manuela Bühler*. Igl è ina situaziun sumeglianta sco en autras uniuns. Actualmain ha il chor ina finamira: «Nus ans participain ensemen cun 332 auters chors a la festa svizra da chant a Gossau», declera ella. Quella è dals 20 enfin ils 28 da matg 2022. Già l'emna proxima, ils 25 d'avrigl, va il Chor maschadà grischun da Son Gagl a Gossau. «Nus esan envidads d'ans preschentar sin tribuna a chaschun da la radunanza da delegads da l'Uniun svizra da chors», declera il president *Gion Pieder Casaulta*. Igl è la radunanza inziala da la festa svizra, exact in mais avant la gronda scuntrada.

### Betg simpel cun tants idioms

Il schaner ha *Manuela Bühler* pudì cumenzar d'exercitar tant per questa radunanza sco per las produzioni da pensum davant ils experts. Sin il program èn tschintg chanzuns rumantschas en divers idioms. «Pervi da la pronunzia correcta n'è quai gnanc uschè simpel», concede la dirigenta ed intunescha gist la cumposiziun «Inceschantüm» da Nuot Vomooos e text da *Cristoffel Bardola*. Igl è ina chanzun populara ladina ch'il cumponist sursilvan *Armin Caduff* ha arranschà. In'otra melodia è «Mies cor stò oz cantar» da *Gion Duno Simeon*. Il text surmiran da *Giatgen Uffer* pretenda in'otra pronunzia. E la chanzun sursilvana ch'els chantan, «La sera» cun text da *Sep Modest Nay*, sto puspè vegnir pronunziada auter.

Trais quarts da las chantaduras e dals chantadurs èn da linguatg tudestg. I n'è damai betg simpel da chantar en tut ils idioms, «ma bellischem», puntuescha ina chantadura en la retscha da las sopranistas. La colliaziun cun il Grischun, las ragischs, confamigliars u contacts speziels han intimà ils blers d'entrar en questa furmazion.

Durant la visita da la FMR a l'emprova constatesch'ins che la diversità plascha a chantaduras e chantadurs. Els paran da dumagnar stupent il pluri-idiomatism rumantsch. Ins ha l'impressiun ch'els fetschian quai perfin anc in zic meglier in chor en ina regiun da tschep. Cun superbia represchenta il Chor maschadà rumantsch da Son Gagl en tutta cas il quart linguatg svizzer.